

Cuira, ils 30 da zercladur 2022

Communicaziun a las medias

La Lia Rumantscha ha pledà contribuziuns finanzialas per projects rumantschs

Dapi sias entschattas sustegna la Lia Rumantscha projects rumantschs. Durant l'emprim mez onn 2022 ha ella sustegnì 28 projects cun ina summa da bel e bain CHF 35'000.–. Il proxim termin d'inoltraziun per projects è il 1. d'avust 2022.

Gia dapi sias entschattas conceda la Lia Rumantscha contribuziuns finanzialas a terzs. Entant che l'emprim rapport annual per ils onns 1919/20 descriva anc primarmain las stentas per vegnir ad ina finanziaziun per las atgnas activitads, enumerescha il segund rapport dals onns 1920/21 gia plirs subsidis concedids ad organisaziuns ed uniuns per ediziuns ed acziuns da different gener. La promoziun finanziaia da projects è restada enfin oz in'impurtanta incumbensa da l'uniun tetgala rumantscha.

Cun CHF 90'000.– sustegna la Lia Rumantscha quest onn projects culturals e linguistics e projects da furmaziun. La plipart dals projects inoltrads è da gener cultural. La Lia Rumantscha sustegna activitads da tut las spartas artisticas, projects interdisciplinars, projects socioculturals e da la cultura populara. En media sustegna ella tranter 75 ed 80 projects ad onn.

Durant l'emprim mez onn 2022 ha la Lia Rumantscha sustegnì 28 projects cun stgars CHF 35'000.–. La mesadad da quels projects sustegnids è ediziuns u reediziuns dad ovras rumantschas u bilinguas, tschella mesadad cumpiglia projects da musica e teater u projects interdisciplinars. La suprastanza da la Lia Rumantscha decida quatter giadas ad onn davart las contribuziuns. Il proxim termin d'inoltraziun per projects è il 1. d'avust 2022.

Ulteriuras infurmaziuns davart las contribuziuns finanzialas da la Lia Rumantscha èn publitgadas sin www.liarumantscha.ch sut la rubrica Instituziun.